

江
西
詩
徵

江西詩徵卷四十二

南城曾燠賓谷編輯

明

沐英

英字文英樂平人寄籍定遠隨明太祖起兵賜姓
朱氏後爲閩國元勲封西平侯復姓沐及卒追封
黔寧王

贈掌記劉彥昂之東阿

大府多軍務頻年案牘勞趨廷宮漏轉簪筆殿香飄柳外
流鶯語花邊立馬騎莫嫌州縣職漢業說蕭曹

劉彥昂

彥昂名炳以字行鄱陽人元季兵亂往依余廷心
尋辭歸明初獻書金陵留贊帷幄久之命叅沐英
軍尋授廣武衛親軍指揮使司知事復徵大都府
掌記補知東阿縣引疾歸有春雨軒集

待渡溪澗寫懷

愛花如夢少年狂雲鬢鸞釵百寶粧三日醉眠金帳底春
衫渾是麝臍香

畫船曾駐渡頭西翠黛凝歌憶送歸今日不堪重繫纜滿
汀烟樹昔人非

繁華雲物都非舊一片寒沙臥夕陽唯有壞垣春雨裏野
花猶似美人粧

桃花扇底春風面一曲吳歌一斷腸
紫陌紅塵多少夢
絲贏得老劉郎

郊居雜興東陳遂良

桃李漫成蹊茅堂習隱栖
泉聲溪碓急山色野墻低
相領原非燕圍腰底用犀不嫌生理拙
抱甕灌吾畦
風雨行人少柴門午尙扃
土花沿砌碧山果墜枝青
病眼耽書癖衰顏托酒星
經邦方上武寂寞抱遺金

寄徐指揮

報國功成鬢欲蒼承恩分節下南荒
劒磨鯨海遺腥血馬渡龍沙帶戰瘡
頒宴晚沾仙掌露賜衣春帶御爐香
信陵門下今誰在萬里雲霄一羽翔

和都督馮公韻

鳳城宮闕倚蒼山，虎衛旌旗拂畫闌。
輦路霜清梅破臘，御溝波暖柳欺寒。
青雲每愧班超筆，華髮應慚貢禹冠。
未信壯懷渾寂寞，錦衣鞍馬出長安。

寄許永明公冕昆年得夫先生

少年曾共請長纓，雲壓旄頭劍氣腥。
諸葛有心扶漢室，包胥無淚哭秦庭。
九鰲夜徙龍沙黑，八駿秋迷鳥道青。
一別關河俱白首，斷腸烟樹滿長汀。

和九日韻寄朱見中

野樹荒臺帶晚陰，昔年歌舞憶登臨。
桃花紈扇西風冷，蔓草銅駝夕露深。
舊夢青雲連館閣，多情華髮老山林。
江南

庚信傷秋倦疎雨簷櫳怯暮砧

憶從天上晏黃花烏帽秋欹鬚影斜宣賜宮壺香注蟻醉
簪綵筆墨塗鴉雲迎雉尾開金闕日射盤輿引翠華退食
從容休沐早短屏驚雨夢還家

春夕直左掖懷周侍御

晚雨池上晴透迤淡將夕金莖華月生綺樹流雲濕窗虛
漏聲永幄捲爐烟襲憶我同袍人何由共瑤席

別京邑之東阿

前年別鄉閭今年出京邑悠悠去江漢杳杳處行役所懼
心志違況此風波急烏啼楓樹烟雁下蘆洲夕回首望長
安蒼茫寸心失

出塞

九重頒鳳詔單于入井陘三邊徵候騎五道出奇兵戰雲連黑陣烽煙照漢青蛇文弓掛月龍氣劒流星酬恩不顧命金印斗來擎

入塞

旄頭昨夜斂徵兵入漢關將軍定勲業壯士悲刀環旌裂雕雲畫衣穿龍錦團積月老鄉淚風沙銷箭瘢閨中謾歌舞今日到長安

獨處愁

金屋人稀到閒螢去復回攬衣離鳳閣緘思捲鸞臺惟有多情月流光入妾懷

予昔與孟思魯參戎事于三衢監司宋公幕府及兵潰得間道還鄉遂歸休之志故歷敘之

嗟嗟漢燧昔沈耀橫流板蕩迷中幾鬼母啼煙赤電走天
狗墮地金星飛志士勤王涕沾臆義旆懸雲昭白日劒擊
風雲向夜悲楫誓山河仰天泣君當少年功節殊短衣倒
騎生馬駒蠻賤草檄墨慘淡寶刀破血腥模糊奏凱對花
歌竊窺量沙臥雪宿瓊璣運籌制勝嘗輕敵凭軾降城不
顧軀幕泛碧油陳雅樂漏殘銀燭合兵符孤軍轉轍輕千
里蕭條榆塞塵沙起秦樹關河落日低漢營鼓角西風裏
嫠女妖氛壓壞牆嚴灘殺氣連重壘羽書援絕闕兵稀古
道行人畏疾藜霜銜白骨飢鳥下秋入金瘡敗馬嘶虞姬

帳下將軍死公子門前壯士歸去國其憐王粲賦望鄉同
擬杜陵詩壯志無成還故里城西茅屋苔痕紫鉤簾聽雨
更焚香挂笏看雲時隱几自信胸澄渤海清寧憐氣與嵩
華倚破浪誰擒北海鰲穿林學射南山雉笑傲行將下澤
車經綸懶取圯橋履草荒三徑掩衡門舊事相逢不忍論
兩鬢緇塵銷歲月一雙蠟屐信乾坤湘上雨晴飛落木與
子登臨散幽獨杖藜出郭蹋平沙一笑尋僧看修竹

七夕對月懷藍胡之黃彥美蔣師文先生

碧梧金井生早秋北斗斜掛銀河流鵲橋靈車儼若渡織
女有約期牽牛古傳此事不可詰五雲彷彿聞笙球翠衣
舉酒酌明月起舞激烈心悠悠但恨玉兔搗靈藥不能醫

此萬古之間愁眼看明月年年好古人已先今人老今人
還是後人哀綠鬢朱顏豈堪保自憐年少心志狂赤手直
欲攀扶桑琅玕披腹扶雲漢擬治堯舜垂衣裳豈無蒼生
待霖雨命與時蹇空昂藏棄官歸來守鄉土破硯凝塵百
無補時令引領送飛雲雕鶚當空秋一羽今年種豆南山
阿斜日荷鋤仍浩歌木葉脫落霜露降時不我延將奈何
明月擬結溪頭屋亂石環牆種修竹扁舟載酒弄滄浪看
雪尋梅剡溪曲

見月行

自憐少年不識月疑是明鏡飛上天但看三五二八夜彎
彎缺缺仍復圓悲歡離合每對此風雨陰晴經幾年壯強

已過今老大俯仰嬋娟不勝慨也曾對月客長安塞驢破
帽西風殘砧聲蕭條夜向夕劍影錯落秋生寒也曾對月
琴樓夜春寒珠箔梨花謝金釵扶醉催曉鷄翠被留香暖
餘麝也曾對月抱遺經燈火繩樞掩草亭薤薤結冰寒走
蘼芸廳露下晚收螢也曾對月榆關戍百戰沙場士爭死
金瘡臥馬瘴烟青玉帳盤雕陣雲紫也曾對月泊瀟湘商
賈淒涼野店荒菰米黑沈烏啄雪柳條翠減雁啼霜也曾
對月東華道影轉金莖閨闔曉玉殿承恩出苑遲瓊林待
宴簪花早衰病歸來百不成煙簑雨笠學躬耕壯心寂寞
吳牛喘倦翼荆畧野鵲驚每慚泛清袁宏詠那復登樓庾
亮情飛葢清園歌已遠乘舟赤壁夢何憑月色不殊人自

改搗藥惟應免長在褰衣弔古倍增悲長跪臨風獻壽醅
朱顏易去不復來一日一醉能幾迴昨日少年今日老且
須置酒登高臺桂花吹香白露下莫惜爛醉黃金罍舊遊
豈無歌舞地銅駝白骨迷蒼苔前人已往今還昔今人寧
無後人憶後人復遣後人哀月落銀河瀉空碧

金銅仙人辭漢歌周伯寧同賦

漢家黃金如土積鑄作仙人一千尺緱氏山頭曉日紅太
乙祠前露華碧琉璃凝彩翦雲澌玉屑無痕浸寒月安期
日日候神仙王母朝朝見鳬舄千門萬戶建明光上苑南
山繞白梁春滿甘泉千樹綠波涵太液百花香白麟朱雁
呈祥瑞寶鼎芝房薦樂章詔遣衛青將驃騎使通司馬拜

中郎侍邊親駐狼居外出塞兵藏馬邑旁龍馬錦鞵來上
谷蒲萄銀甕出西涼李陵臺畔西風冷蘇武坡前落月荒
暮年始下輪臺詔思子宮前雙淚繞壯志淒涼天下悲巡
幸東從海上迴封禪無成還碣石長生不復望蓬萊鼎湖
龍去秋蕭瑟金鳧銀雁燈如漆空遺弓箭慘無神青龍使
者宮車出萬牛如山千里來老淚裂背銅仙摧前車未改
後車轍昔人不盡今人哀傷心秋草茂陵苑又見東風銅
雀臺

題李陵蘇武泣別圖

臣有千古哀覆水一去難再回臣有三寸舌染絲一黑難
再白丈夫瓦裂聲名虧漢不我待將安爲吞聲長哀送蘇

武忠肝惟有青天知烟沙蕭條壓冰雪心事淒涼淚成血
誰憐魂魄老烟塵空有丹心瞻漢闕日斷關河夕照迷茂
陵烟樹草萋萋將身不似雲邊雁猶得年年故國歸

明妃曲

胭脂馬雕鷹旗狐裘蒙茸金絡羈白玉作鞭雙袖垂手抱
琵琶紅淚滋黛雲半蹁顏如玉春嬌學得娥眉綠自擬將
身寵漢宮誰憐薄命歸殊俗窮陰絕漠易悲辛落日哀笳
處處聞嚴霜夜鏢關頭月朔氣寒飛磧裏雲鴻雁蔽天斜
作字駱駝連塞動成羣漢家君臣亦良苦却將紅粉和戎
虜廟堂內食列重裯汗簡如何照今古妾身分得君王憂
萬死風塵心亦休腸斷年年邊地夢心懸日日漢宮愁百

年一身何足道妾容不似花容好漢家三十六宮春傾國
傾城更有人君王故殺毛延壽特遣單于貴妾身

行路難

奉君五彩鳳凰之綺幄七寶鸞鴛之錦牀博山氤氲之水
屑金盤沆瀣之瓊漿春風無情不相待朱顏綠髮年年改
姑蘇臺上鼓如雷四時歌舞百花開當年意氣今安在鬼
火如燈秋似海

河中之水歌寄劉子雍程伯羽

河之水向東北洛陽女兒好顏色八歲畫蛾眉九歲自裁
衣十歲學識字十一拋梭攀錦機十二刺繡紋十三能賭
棋十四彈箏篴十五纔上頭鬟偏斜戴金團鳳臂弱不勝

珠絡繹羅幃睡起傷春瘦畫閣妝成對日羞十六妖嬈解
歌舞容色比花花不語扶持生怕下堦行三寸春嬌雲一
縷行媒將聘嫁周郎桂柱蘭堂錦作房比翼鏡奩粧玳瑁
合歡裙帶繡鴛鴦茱萸露濕珊瑚枕蘇合香薰翡翠牀生
憎啼鳥催春去不忿啼鳥怨夜長杯成連理生何幸釵合
同心死不忘眼前節物年年度只恐芳華不相顧南陌笑
蓉午夜霜東園桃李三春雨君當爲妾秉燭遊東海爲飢
糟作邱妾當爲君金鏤謳春風莫遣人間愁

寒食客秦淮憶舊

去年寒食長途客桃花落盡梨花白今年寒食客秦淮杏
花李花無數開東風凋殘白羽箭落日獨倚黃金臺緇塵

蕭騷吹病目破帽烏靴泥漉漉藜杖東山弔謝安悵望飛
雲仰天哭淒涼心事更誰憐綠綺可以調絲絃子期已矣
伯牙死高山流水空荒烟王孫不歸芳草暮解衣沽酒驅
愁去誰言一醉可消愁酒入吾腸肝膽露便擬揚帆析木
津仍期挂劒扶桑樹志士長歌溝壑憂功名百歲等浮漚
雨晴浪暖沙豚上載酒滄江弄釣舟

寄徐宗周兼柬楊與文阮宗泰

李家池頭去年別大風揚沙天欲雪贈我鯉魚三十腮楊
柳穿來帶寒血今年八月芝山樓我欲少住君不留蹇驢
落日冒秋暑鬢絲汗溢黃塵流近過阮公茅屋底說君沉
疴幾不起九月十月方離牀強健近來差可喜相望片雲

老石山來徃每嫌消息異斯文凋謝少知己恨不連牆相
徃還卻憶少年從義日聞雞不眠追祖逖殺敵風吹寶劍
腥打圍雪壓雕鞍濕諸葛曾懷漢室情包胥亦有秦庭泣
投老相看四海清夙昔患難同離情歸來廬井有桑梓拜
掃邱墓除榛荆傳家書在晚還讀賁郭田深春自耕愛君
窗前修竹大聽雨何時對牀臥卻扶藜杖過楊兄使酒怕
渠將罵坐氣概頗與常人殊天經地軌談陰符黃岡溪頭
懶垂釣未央殿前思上書功名定有國士報肝膽好將民
瘼蘇黃金臺高一千尺白日橫飛虎生翼呂望八十方致
身五十富家朱買臣時來勛業自有待豈得甘作漁樵人

次秋日韻奉汝弼叔

墨池秋淨水痕澄曲几焚香袖手憑霜殺柳條清栗里雨
荒瓜蔓覆東陵敗餘趙壁車還列說下齊城軾獨凭因憶
少年隨驃騎西風笳鼓醉呼鷹

三徑歸來菊未荒半凋楊柳弄春涼銀屏紈扇題秋句金
鴨羅衣換夕香老憶風雲趨北闕夢無花月待東牆狂遊
尚記秦樓別翠袖紅絛拭淚行

崩城操

朝從城上哭長城與雲齊暮從城下哭長城化爲泥嗚呼
城崩兮猶可築夫君死兮百身莫贖

得漢驛簡周伯寧索香灰

古驛多歎識蟠螭漢篆存黃金銷土色翠羽飲雷文綺席

流寒月銀屏度綵雲蘭灰能裏寄長吟盡夜分

憶園廬

種園在東皋草荒瓜蔓長日落秋樹涼褰衣獨還往時逢
野老憇自足田園賞浚溪塢忘歸古寺煙鐘響

哀傳子初

柴門對青山茅屋俯流水伊吾夜無眠寒燈墮紅蕊聲名
一朝振車馬動閭里書臺懷暮煙過客猶仰止

哀辛好禮敬

王風委蔓草大雅何微茫嗟哉逮梁宋孰能繼虞唐鸞鳳
著文彩雲漢昭天章九原不可作悲風摧棟梁

哀蔣師文易

江西詩徵

卷四十二

明四

十

道南萬書樓文藻冠閩土早起揭文安子史深汲古束帛
黃丘園高臥守環堵便便五經腹皓首心自苦

哀周伯士

上清人

陰洞懸乳泉石沁古苔峭紺粉落秋江芙蓉澹斜照孤吟
白日晚聲嶂元猿叫高懷誰與儔天風遞長嘯

哀趙子常

晨樸歛山青暮汲歛水淥閉戶動一紀守道不干祿平生
春秋傳疑義如剖竹哀哉青城翁心喪三年哭

哀高季迪

閨門前樹烏啼華月圓詩吟倚樓上午鼓未成眠翠袖
添瑯鴨烏絲寫粉箋每懷經濟念鸞鏡感芳年

哀万方壺

蓬萊五雲宮金粉飾椒壁醉時臥瓊瑜酒醒灑墨汁傲世
雙眼高鬼谷白雲濕玉堂寄書來落月夢相憶野鶴弔孤
松衰螢照荒陌

哀黃季倫

折節委榮寵顧將生死齊秋荷補壤衲空林旅幽淒懸燈
禮繡佛清齋烹露葵虎溪流古月自與遠公期

哀葉楚庭

船頭酒百壺船尾書百冊間騎桃花馬醉弄西湖月狂吟
捲秋濤聲撼扶桑折滄海無還期哀魂楚雲結

哀吳用晦

其祖月灣先生也

滄灣俯空寒老月懸古色殘花漂斷沼野徑繞荒宅王珣
稱短簿牙笏猶故澤文藻遺江山蒼茫暮烟隔

東武吟

壯年投筆去手提三尺箠戎衣纔至胥短劒光陸離國士
每自許獨賴相公知解衣衣我寒推食充我飢心懷犬馬
報未有涓埃施十年在幙府徒將文墨持前星一夜落天
地黯無輝功勛都若夢部曲各分違春草門前綠空遺櫪
馬嘶月痕弓尚掛雲影旆猶垂霸氣風雲散姓名誰復題
落日將軍樹凄凉過客悲長哀波浩蕩不盡淚如絲

桃葉青

桃葉青青杏花吐樓頭吹笙教鸚鵡紅牙象板按梁州金

縷衣裳美人舞離情不似月常圓桃葉青青似去年美人
不來鸚鵡怨杏花零落畫樓前

雙桐生空井

井上雙梧桐秋風易搖落綠葉墮鳴璫清陰捲重幄紋愁
生旅葵銀瓶響空索陳枝覆烏臺交柯臨鳳閣美人矜容
儀照影傷今昨鉛華逐波逝歡賞隨年薄行客攀轡轡哀
聲隔簾箔

燕子樓同周伯寧賦

寶瑟凝歌繞珠箔流蘇結帶黃金索翠紅香裏宿鴛鴦春
風人間無此樂杏梁塵暗麝蘭篝黛鎖眉峰掩畫樓燈殘
枕冷梨雲斷秋雨人間無此愁

寒夜怨

月來愁亦來，心憐月去愁。應改樓高月，轉遲停箏坐。倚熏籠，待月落却成眠。誰知枕冷，愁仍在。

經撫河遇雪舟中睡午方起

沙溪風寒飛雪狂，風大不敢開篷牕。蒙頭裏被睡過午，柁底浪急聲春撞。岸上楓林茅屋小，新年家家無米糶。土竈作炊烟滿船，灰壓濕薪蚯蚓叫。山僮不惜途旅艱，靴綻衣薄雙眉攢。艱難末路乃如此，富貴有夢真邯鄲。卻憶瓊林侍宮膳，雪花不入黃金殿。酒上朱顏萬國春，花簪烏帽千官宴。錦綫彩筆賜題詩，仙仗頻移出苑遲。衣惹御香羅袖窄，馬蹄歸踏杏花泥。

弔晉安將軍歌

荔枝城頭花簇簇王孫不歸春水綠黃金臺前烟草荒傷
心獨倚青雲哭淚灑鑾江江側流楚魂暮咽楓林秋蕉黃
醕綠湘竹語峴山石斷行人愁信陵門下簪纓會珠履筵
前幾人在軍中擊鼓夜不眠珠翠成行鳴劔佩王孫王孫
真貴人落筆龍蛇驚鬼神千金散土馬蹄盡鉄甲盡臥雙
麒麟桑柘陰陰連大路野市書聲晚當戶部曲悽涼白髮
稀甘棠猶指將軍樹玉鳬金鴈漆鐙殘化鶴千年何日還
有酒誰澆趙州土碧血化雨苔斑斑王孫王孫不可招仰
天擊碎青桐瑤寸心何處寫哀素江上年年生暮潮

承承堂爲洪善初題

善初三洪諸孫

天狗蝕月歲靖康血戰于野龍元黃神鰲夜泣九淵沸翠
華日薄寒無光主憂臣辱誓萬死直以隻手支扶桑燕山
六月雪花大節旄零落飢膚傷關河蕭條月色苦秋風揚
沙吹鴈行子卿歸來典屬國茂陵樹老愁雲荒至今勛業
昭簡冊大書特書遺典章承承堂前春畫永牙笏金魚堆
滿床芝蘭玉樹競媚秀陶令松菊凝秋荒盈缸釀酒介眉
壽槐陰覆堦萱草長忠宣盛澤實且美宜爾子孫宜爾昌
題方壺畫爲斯貞姪賦

巨然畫與書法同縱筆所至生秋風墨飛原氣瀉沆漉青
摩斗角連崆峒遠岫平林斷還續苔根斜迸山泉綠釣倚
丹楓野老磯門垂碧柳幽人屋壺公騎鯨白雲鄉莖樹綠

泣烟草黃風流文采今寂寞對畫泪痕沾我裳

題蔡宗文趙氏譜牒後

苔連椒壁雲痕濕霓旌無色金仙泣杏花依舊落胭脂梁
苑凝烟春草碧相逢彷彿說前朝譜牒香遺古錦標前代
王孫今老矣天潢如髮際雲濤

漢之季

哀故御史余公闕
守舒城死節而作

漢之季洪流何湯湯赤子爲龍蛇蔓於漢以淮割我城邑
圖不祥天子曰嘻予何以奉宗廟朝羣臣登明堂曰子近
臣御史闕咨爾撫師古舒國闡以外爾制之賜爾三百衛
士斧與節毋黷民毋究刑苟附而安文武并用禮之經臣
闕昧死頓首泣主憂臣辱敢不力御史騎馬來萬姓淚落

喜且悲子我塗炭民漢官威儀今見之東市牽牛羊西市
羅酒漿紛紛列道左御史下馬相扶將諭以天子聖且愛
明見萬里外宵旰不遑食兵爾飢爾苦顛沛御史雖愚願
知忠與慈惟爾患難相扶持鼓爾鼓旗爾旗疾則疾徐則
徐壯者戰守老者居俾爾農桑毋奪時桑青青麥茫茫牛
羊走邱墟御史城上行茅屋人家聞讀書以心感人心敵
至輒敗不敢窺城東啼虎豹城西嘯熊羆黃攻始退山
越什什伍伍來相圍裹瘡戰城南吮血戰城北大船小船
捍江列嗟城中如流魚御史奮臂城上呼悲風揚塵沙起
白日無光士爭死廩無粟士氣衰朝食城上草暮煮城下
其病疫相枕何流離御史斬愛馬士卒不忍食日久接不

來矢盡兵殘益危逼泉騎死野戰烏鳶銜肉流尸殭孤城
坐殄瘁上山地道不可當御史誠不德握手謝父老爾民
多殺傷御史登城北面拜稱臣萬死無以報陛下闔室竟
與城俱亡楚山蒼蒼楚水洋洋御史之節功烈顯彰天之
奎壁地之河嶽人之綱常千載弗渝日月普光誰能置廟
復立社享爾祀爾百世及天下

潯陽行

江頭女牆啼野烏亂石如墨驚濤呼潯陽九派控吳澤匡
阜千峰迴楚墟當時形勝夸疆土連雲宮苑旌旗樹庾亮
樓船赴國仇黥王版籍歸英主盛年一去水流東冠蓋繁
華處處空兩岸蘆花浸明月滿汀烟樹鳴秋風古戍何人

晚吹笛客船莫向城邊繫翠袖琵琶夢已寒青衫易灑天
涯淚

過南湖嘴

城頭開舫北風起帆輕直過南湖嘴上水歡呼下水嗟龍
王廟前淮燒紅小婦攀昏楊柳磯淮鹽換得鱖魚肥沽來
新酒不成醉臥聽隣船歌竹枝

義士歌

番陽胡公字振祖當元之季以義起兵尅復郡治
紀功授饒州府判後從官軍轉戰至浮梁與敵相
拒糧盡矢絕義不辱憤罵以身死之鄉貢蔡淵仲
先生爲之立傳予作歌以表其節義焉至正甲午

也

崑崙盡裂黃河決京畿地毛白於雪鬼母啼秋天雨魚武
庫兵鳴劍飛血黃屋播越烟塵張四海感激思勤王鄱陽
胡公軀七尺義旗塞路寒無光爲肩火色萬里壯虎氣電
目千夫強坡頭陣雲壓輦鼓醺酒椎牛題露布破釜沉船
曉更征囊沙壅水宵還渡萬乘千旗驟騎營轉戰直薄浮
梁城孤軍糧盡朝餐草間道人稀夜煮冰鉄甲照霜弓影
曲寶刀磨月水痕腥旄頭芒射前星落恃勇驍騰身不却
淒涼馬革裹屍歸誰復聲名寫麟閣郡侯紀績筆如椽父
老相傳泪泫然三尺荒墳何處是忠臣後代子孫賢

瓊姬墓宋仲珩同賦

野花凝粉鉤瓊姬醉時面夕露柳絲長瓊姬晚黛妝行人
墳上莫回首一顧春風一斷腸

田家樂寄張師孟

田家樂今年庄農好秋作蟄龍蛻骨枯棹懸五穀咸登時
雨若官家更憂民力疲公田折布能輕齎小姑攜筐懶梳
洗拾得綿花如雪肥大姑軋軋催機杼疎簾樹影寒蛩語
鬢雲籠霧颺西風眉月生涼褪秋暑山徑牛羊下夕墟蕭
蕭榆柳草堂虛野老杖藜邀小酌諸孫燈火讀殘書

題朱澗槃卷

遙峰連碧磻茅屋俯青林徑晚花粘屐松寒雨澗琴酒甘
和菊釀詩苦帶茶吟卻憶文園老歸來雪滿簪

夜直呈翰林諸友

中使傳金鑰嚴兵戒紫扉
月高旂影直風急漏聲微
鵲倦驚龍燭螢閑綴鳳幃
不眠瞻北斗拜舞敢遲違

青樓曲劉子雍胡伯清程伯羽同賦

畫闌落盡絳桃花依舊尋芳小
徑斜鬢黛壓釵金有暈臂
酥凝釧玉無瑕三千弱水波清淺
十二巫雲樹碧遮郎馬
不來春已暮淚痕香斷濕琵琶

繡剩鴛鴦午睡長體嬌無力
浴蘭湯生憎寶鏡鴛成匹
死恨銀箏雁作行舞罷柘枝低拜月
歌殘桃葉懶添香愁來
自學秦宮女簾底吹笙引鳳凰

楚腰纖細錦纏頭秋怯珠簾半搭鉤
雲戀陽臺雙作夢月

生湘浦獨成愁鸞校折齒花粘髓螺粉添眉柳帶羞鴈過
碧天書帛斷誤教人倚小紅樓

寒鎖粧臺粉怯勻步蓮金小不生塵徑迷花雨鶯鶯月枕
壓梨雲燕燕春衾剩半床閑翡翠釵分一股擘麒麟玉梅
好似郎顏色只見東風不見人

旅中除夕簡劉子憲助教張左司

窮煤凝鴨鎖牕虛處衛嚴城禁漏疎鄉夢牽情千里遠客
愁隨臘一年除酒痕釀暖春連蠟梅粉吹香晚近府自寫
桃符燒短燭壯懷那厭食無魚

早春呈吳待制

上林春早陌塵香紫禁觚稜射日光新綠御河搖柳黛小

紅宮樹試桃粧山連曉氣蟠龍虎臺枕東風憶鳳凰心折
故園幽興獨尋僧看竹過隣牆

春寒寄魏居敬

上苑春寒花信遲東風不放鎮帷犀柳塘沙冷迴鶯夢草
閣梁深落燕泥苔蝕井楣蝸觸角簪蓮香炷麝凝臍典衣
剩欲銷塵鬢暖日城南信杖藜

寄賈文彬巡檢

故人爲別動經春野渡維舟送夕曛銀燭照牕秋聽雨角
弓懸壁晚看雲山城旗影中流見草閣書聲隔岸聞江漢
茫茫多舊識猶能俎豆說將軍

呈西平侯沐公

股肱竭力定皇都開國功成與衆殊玉帶朱纓持虎節翠
支金鉞護龍車秦關柱石風雲會漢室山河日月扶慚愧
腐儒無補報得從門下曳長裾

寄表弟朱永客永寔昆季

渭陽河畔畫樓西紅粉闌干柳樹齊
牕底折花騎竹馬街頭籠草闌山鷄
銀屏褥隱鴛鴦並綺戶香凝翡翠栖
回首繁華成舊夢對床今雨不堪題

燕城懷古

廣寒宮殿玉爲樓萬歲鰲峰壓九州
番國胡僧青鼠帽天魔宮女綵龍舟
鉤陳蒼闕山南拱太液紅橋海北流
唯有瀟瀟土月年年鴻鴈不勝秋

拜外舅陳公禹謨墓東陳原輔

貳館東風憶昔年
笙歌如沸酒如泉
麒麟錦帳銷銀燭
孔雀雲屏列玳筵
井塌銅瓶渾臥雨
香闌瓊佩已迷煙
傷心孤塚楓林外
寒食殘花墮紙錢

鄱城歸舟同何希憲共載劇談悲歌有感

霜落長河見遠洲
天晴歸棹喜同舟
青連碧樹山回轉
白湧寒沙水倒流
弓影浮杯疑老病
鷄聲牽夢動離愁
英雄過了前三十
晚景桑榆愧白頭

同周伯寧連榻劇談悲歌有感

醉來扳劔斫珊瑚
嬾向候門更曳裾
夜半聞雞眠不著
草堂秋雨讀陰符

聞魯志敏訃音

故國猶傳箭中原未解戎遙聞故人死雙淚落秋風

秋詞

廣寒樓閣玉爲梁月裏姮娥百寶粧流水莫題紅葉句人問天上隔宮牆

題葉楚庭醉漁卷簡彭敬宗劉子原子載子明

落盡荼蘼草覆裯二分流水分塵小車都載鵝黃酒蘇小墳前醉過春

泊瓜洲懷舊寄顧利賓王又新隱居

潮聲月色滿江船回首春風十六年憶得石橋楊柳巷珠簾銀燭聽歌眠

簡周伯寧

漂零書劍愧無成
日夜秋風白髮生
倘得黃金三萬兩
肯將籌策讓陳平

東湖憶舊簡劉子雍胡伯清汪宗彞

蕭家巷口花如霧
紅粉闌干酒旆斜
記得少年曾繫馬
如今無樹可啼鴉

離懷寄汪宗彞楊孟瑄魏居敬

垂垂江雨作春波
江上行人晚唱歌
莫遣青燈照衣袂
酒痕不似淚痕多

暮春寫懷

晴雪飛綿柳樹斜
雨餘紫陌淨無沙
春衫日日騎官馬
兩

袖東風看落花

秋詞

紫電宮嬪曉貫魚靜鞭當殿肅金吾近臣知道天顏喜東
殿疏凶有諫書

涂穎

穎字叔良進賢人元季遊京師不遇僑居金陵從
學於余廷心楊顯民程以文龍鳳時爲中書典籤
太常博士

秋夜和黃典籤

遙夜天宇迴開軒坐前楹月華臨水動涼風滿庭生屢惜
元景至惜茲塵慮清疎星明玉闕委露瀼金華流序條將

邁嘉朋紛遠征微才旅羣彥鳴珮集玉京文詞資麗澤
磬感同聲非比江湖客馳心搖遠旌

題山水圖

憶昔灤陽八月歸北風吹雪灑秋衣
檜竿嶺上停車望萬木蕭蕭落葉飛

上京次貢待制韻

海風吹雨度龍沙滿眼金蓮紫菊花
日暮笙歌何處起高低穹帳五侯家

蓬萊仙子學長生羣帝朝天絳節迎
昨日六龍廻北極雲裾霞佩集灤京

竹宮窻窻秋風晚芸閣沉沉晝漏稀
獨有蕃僧承詔罷紅

衣白馬退朝歸

閤山雜詠

樵溪折折入冰壺雪壁仙人自有無解道紅泉如可問此
生期作掃花奴

赤烏碑仆事難憑碧瓦年深裂作冰自是神仙香火外不
緣風雪斷香燈

冰天壓屋四無聞江樹連峯總化雲但得瓊漿換毛骨直
將人世葬書焚

羽衣謾謾勢如煙仙籙無人得秘傳今日雲孫化巫祝當
年菌閣變葑田

流珠久閉杳難逢石室纍纍尚有蹤明月在天人在雪三

更私自禮東峰

側聞咳唾成珠易驚見梅花化石難香處欲尋尋不得一
簑風雪過橋寒

玉篆中分斧劈痕人言雷火掣天門石蓮一解風開落十
丈今無一瓣存

衣裙忽滅東峯頂雞犬難從半睡中弟子無聞丹竈冷空
留瀑布響天風

飛禽竊食語通靈峯頂猶存藥臼形凍手摩挲無所得長
生惟有石苔青

露盤直瀉上池水玉桂高搖碧落煙雁宕匡廬甲天下無
人來看第三泉

峽山寺

峽雪涸冰泥春氣不得上竹柏結高寒寺門闕青嶂泉從東峯來神丹有遺響飲者不知功齒髮日加長

吳宏

宏字德廣鄱陽人元至正間項普壽陷饒州宏起義破賊衆多附之陳友諒授宏平章守餘干後奉圖表歸明從太祖征有功拜中書左丞參贊徐達軍至秦州卒

松石窩徐宗別室

長松竊窈石崔巍隱者深窩紫翠堆夜半風聲搖渤海春深雲氣擁蓬萊白羊化處蒙苔起元鶴飛時帶月回莫道

山中葺獨美湖邊亦有釣魚臺

周 湏

湏字伯寧鄱陽人與李宗頤劉原善辛敬萬石楊伯謙輩稱江西十才子明初爲大理寺丞詔偕李善長等定律令累擢至刑部尙書降惠州經歷卒

按明詩綜作江寧人茲據通志收入

始發建業登龍江山祠感懷有作

去國思舊遊尋山發幽眺遙凌天門石恍對臨海嶠神關列雄鎮危堞抱遺廟秋陰散氛翳炎景扇餘燎天水遠白空雲霞近爭耀客行始多感世事紛難料同俗豈素懷趨時固殊調旣爲達士恥復被逐臣誚行矣庶無欺忠信將

可劭

舟中望九華山

貞履無素期勞生意恒窘誰云戒戎路曾是返初隱水宿
淹長暑山行阻修吟縹緲對雄標嶺岼發奇蘊巖回氣如
熾峰去勢猶引刻削冠青蓮雕鏤盡丹筍岷霞上斑斕石
乳下礪礪山鬼從文狸淵靈闕元蜃睠言志藜藿未遂采
芝菌卽事情已悲懷賢迹俱泯潛吳媿梅福去汶羞閔損
人德險未夷天道明可準皐蘭豈徒歇巖桂方未隕歲暮
山中人寤歌候歸軫

賽小姑廟

育秀凌華嵩標奇莫准楚陽闢啟神闕陰沉開水府林林

聚商舳淵淵聞戍鼓陳瑟會安歌傳芭紛代舞椒漿旣芬
潔桂櫂方容與日暮懷歸情含涕望修渚

題營邱山房

周室疏封後齊疆啟國初流風看後裔形勝想遺墟水合
如分魯山回似入徐路疑登岱處溪擬釣璜餘紅樹臨關
近青蕪際海疎徵賢方奏頌何暇賦閒居

劉潤

潤字潤芳廬陵人讀書工醫與吳宏周浪友善

武陵送客

江亭欲別意綢繆來送扁舟到石頭暮景自知能幾會清
時未卜轉多愁問闌求友林中鳥蕩漾相親水上鷗覽物

固應謀共隱吟窩宜爲覓深幽

珠湖夜泊

蒹葭露白雁驚寒獨對蓬窗夢已闌水面天開纔尺五海
門月上欲三竿側身宇宙傷多難垂老風波苦未安卻憶
江亭嘗燕坐看人舟楫犯狂瀾

章綸

綸字子魚餘干人傭畊養母業卜筮年二十九始
讀書嘗以詩謁虞揭諸公至正末起兵拒紅巾賊
陳友諒陷江西吳宏辟入幕不就入明爲州學教
授卒

羊角山房爲杜隱君作

羊角山峯羅紫翠結廬高隱俯滄洲丹從澗上龍來問穀
付林間虎爲收香霧滿窗紅日曉玉光橫几白雲秋東華
長有尋仙者珂珮鏘鏘到上頭

許 瑗

瑗字栗夫樂平人元末兩舉於鄉皆第一授廣德
學正遭亂放浪江湖間偕宋濂同赴召獻平亂策
命參軍事尋守太平府陳友諒兵至與花雲王鼎
同被執抗罵不屈死贈高陽郡侯

程烈女墓

程家女子十三歲慷慨捐身烈士同奮節直堪山石裂招
魂翻恨井泥空嬰兒撤璫寧非孝幼婦書碑此更工三尺

孤墳足千古數株松柏自西風

鄭倫

倫字子夔安仁人元末以虞文靖揭文安薦授寶慶儒學明初應秀才授參贊江淮幕隨征張士誠有功尋乞病歸自號環谷野人再詔起以年老辭進言治世當用中和之道太祖嘉納親製古詩賜之歸旋卒

青山茅屋李元德居

何年李愿歸盤谷火後收書結茅屋青山如龍天際來白雲時就簷端宿秋風捲處補垂蘿夜雨無聲和鳴竹傍人錯認孔明廬那用經綸起西蜀

黃惟宏

惟宏字士能新喻人元末中副舉授上猶教諭未
赴歐祥陷新喻惟宏仗義克復兵敗被執得脫間
行謁明太祖一見奇之移書諭祥來降以功授江
西行省郎中從鄧愈征熊平章卒於泰和著有吾
雲集

克復新喻州作

不見征南馬伏波布衣赤手奮天戈愁添白髮書生老散
盡黃金壯士多南國已沾新雨露中原不改舊山河夜瞻
北斗知天近今日三方奏凱歌

洪州贊明太祖作

南通衡嶽極西江坐制羣雄立紀綱神物自天扶赤帝武功蓋世合真王雙龍寶劍于牛斗萬馬銀鞭耀雪霜早晚膺圖成大業肯留多士在戎行

熊鼎

鼎字伯穎臨川人元末兵亂結鄉兵自守陳友諒脅之不應明初贊鄧愈軍除考功博士歷浙江山東僉事進副使以事左遷岐寧衛經歷爲朶兒只班所害

長安懷古

立馬平原望故宮關河百二古今雄南山雙闕阿房近北斗連城渭水通龍去野雲收王氣鶴巢陵樹起秋風英雄

事業昭前哲看取秦皇漢武功

上巳日浴溫泉

驪山宮殿鎖溫泉天寶遺蹤故宛然繡谷春融丹井火金
波月滿鑑池蓮玉顏承寵專恩澤翠輦來遊惜暮年我亦
逢時修禊事白頭空負麗人天

周維翰

維翰字時憲寧州人元元統三年年十四魁江西
鄉薦元季兵亂保障鄉邑明兵至率衆歸附進大
明正德頌隸都督曹公幕下旋以疾乞歸有周氏
華萼集

題老婦騎牛吹笛圖

楊妃血濺馬嵬坡出塞昭君淚更多何似阿婆牛背穩西
風一曲太平歌

張里

里字示仁德興人性篤學涉歷羣書明初平僞齊
董戰檻紋功當遷以母老辭有東山集

靜住寺

四山環抱遠一徑入雲深老樹斜穿石頽垣半礙林虛空
知佛性清淨空凡心回首煙霞外疎鐘起暮音

葉瓚

瓚字瓚玉貴溪人元末任婺州學正明太祖取婺
州置行省中書召儒士講論經史敷陳治道被首

選將大用之以病歸卒有孝經衍義廣行先賢傳

石坡集

題瑤壚譜

吾宗四五百年餘十里青山昔所居古堞平蕪唐鎮使故
家喬木宋題興春風瓜瓞綿綿遠秋雨蓮芳處處疎珍重
溪南有分派白頭猶著一行書

陳汝言

汝言字惟允南康人遷吳徵子汝秩弟少知兵工
畫山水與王叔明齊名參張士誠軍頗用事明初
官濟南經歷坐法死臨刑請作畫畫畢就戮有秋

水軒集

古詩

皇風去已遠王霸不復論空遺聖經在學者誰能尊物情
何溷濁干戈相并吞禮樂既不作安使風俗淳撫几三歎
息哀哉吾道淪

蘭

蘭生深山中馥馥吐幽香偶爲世人賞移之置高堂雨露
失天時根株離本鄉雖承愛護力長養非其方冬寒霜雪
零綠葉恐彫傷何如在林壑時至還自芳

軍中與劉公宣分韻得夜字

日暝川路遙江寒木葉下鳴笳發洲渚偃旆泊清夜肅肅
南鴈翔耿耿銀河瀉委身照戎事行役豈云暇孰不感所

懷當知歲時謝

舟過錢塘有感

錢塘江上水悠悠落日扁舟送客愁
雲氣欲含千嶂雨潮聲遠帶大江流
征帆且復停洲渚晚飯應須上舵樓
見說西湖載歌舞春風不似舊時遊

送黃尚書之江西

驛路花如霧春江似苔尚書今日去
從者幾時回解纜聽潮落張帆趁曉開
相思南浦上明月滿蘇臺

題靈巖寺

靈巖之山山木稠山僧結菴居上頭
蒼松風裏作龍吼白雲窻前如水流
憑闌始悲人世迫舉目更感江山秋
千年

霸業俱陳跡落日寒烟生客愁

送謝從義知杭州分題岳王墳

荒墳秋樹影蕭蕭只有孤僧伴寂寥
二帝遊魂歸不得百年枯骨恨難消
山空永夜愁寒雨江濶悲風起暮潮
若到錢塘逢故老傷心切莫問前朝

雜詠

空庭清晝永花落見春暮誰念未歸人
草色江南路

歸來

春城踏踏馬蹄輕醉裏歸來鼓二更
月滿青樓人不寐政將新曲按銀箏

雜興

皎皎秋夜月流光鑒薄帷憂思不能寐況此蛩聲悲攬衣
起徘徊四顧安所之故鄉渺何許身在天一涯

秋風起蘭皋蕭蕭墜霜葉空庭坐無眠清漏何時徹美人
胡不來憫我經年別相思復相思中腸九迴折
黃鵠四海志良馬千里心丈夫誓努力奚可終陸沉感此
秋節至砌下蟋蟀吟愁來不能寫且復絙吾琴

從軍

蕭蕭戎馬鳴悠悠赴遐征灑涕別親戚前行有期程骨肉
恩難斷負戈且吞聲開邊報明主寧顧死與生

我非將門子生本良家兒少年事馳騁射獵南山陲邦家
有急難詔書下丹墀跨馬出門去立身當及時

平沙浩漫漫行邁不遑歇父母生我時豈知從戰伐風吹
隴頭樹月照原上骨成功勒燕然千載名不沒

笳聲與隴水鳴咽夜復朝後隊來何駛前軍去已遙天高
月皎皎野闊風蕭蕭寧知主將略不在弓與刀

去年滅龜茲今年斬樓蘭不憂道里遠但念衣裳單北風
捲沙雪淒淒日夜寒安邊在今日焉敢辭苦難

將以勇而決兵以練而精信賞乃必罰置死而後生勿云
古人長勿視今人輕一念苟忠義活人有令名

下馬滄海頭磨洗刀上血翻思殺敵時奮勇肝膽熱丈夫
身許國此心久已決生當樹功勲死當立忠節

從軍二十年歲月忽已久百戰幸不死朱顏成老醜王事

尙紛紜故鄉空轉首千人萬人中誰人無父母

製衣詞

妾把春蠶絲動向寒窗織織成鴛鴦紋洗花染春色誰知
裁翦時爲郎三嘆息郎身別已久長短今未識聊將夢中
兒彷彿試刀尺霜天萬里途持寄淚沾臆願郎著衣時細
看針線跡

題春山圖

春雨正霏霏春林笋蕨肥魚驚花下艇犬吠柳間扉溪水
濃如酒山雲白似衣悠然玩清景慮淡已忘機

亭上

汲清漱晨齒沐髮冠新幘閑來歷亭上對此南山色天高

雲鳥空秋淨水花白悠然淡忘歸孤懷聊自適

荆溪舟中次子素潘先生韻

二月過荆溪扁舟思欲迷家家芳草綠樹樹早鶯啼水接
遙天闊雲橫遠岫齊張公洞前石記得昔年題

端居

端居息塵情春明晝初永風來池上樹雲度簷前影處世
欲何爲感時聊自省閑將篋中紙謾寫江南景

秋閒

華月初生夜高樓獨倚時天長人去遠秋半雁來遲寶瑟
淒涼調銀箋宛轉詞應知愁似海不解髮成絲

登溪山第一樓有懷倪元鎮

清晨獨倚樓。秋色淨如洗。山青雲弄姿。江白風初起。心隨沙鳥閑。日送征帆駛。對景每懷人。相看隔千里。

秋夜

蟲鳴秋夜永。木落衆山秋。客館一窗月。故鄉千里愁。不才深自省。何術爲身謀。慈母遙相憶。應添雪滿頭。

送僧之越

江柳絮濛濛。遊方入剡中。山藏神禹穴。草長越王宮。線衲春沾雨。蒲帆曉趁風。禪心已無礙。去住本來同。

夜宿吳中承天寺

因過城北寺。似與世相違。疎雨生秋思。微雲漏月輝。鶴驚林外磬。螢點竹間衣。悅悟談元旨。蕭條共掩扉。

秋興

暝色上高樓砧聲處處秋月從今夜滿人在異鄉愁烏鵲
棲難定星河影欲流隣家莫吹笛歸思不能休

渺渺空江上孤城起暮烟艱難逢此日烽火又經年興逐
秋風起愁隨夜月懸故鄉千里隔回首正淒然

奉陪遂昌鄭明德錫山倪元鎮讌潘中昭左丞園亭
分得霧字韻

林園春雨餘竹色浮綠霧美酒生微波殘梅雜芳樹塵喧
隔清池元賞愜幽趣偶同文翰遊及此良時遇

寄倪雲林

高人只在南湖住未踏扁舟往見之詩到每驚陶謝句別

來空負范張期
花明曉日啼黃鳥
谷暖春風長紫芝
此日幽居想無事
水光山色滿簾帷

秋日寄王叔明

吳門又是經年別
楊柳花飛兩度春
君去定應歸舊隱
我來仍復走紅塵
天涯戰血流荒草
江上秋風起白蘋
日暮淒涼對城郭
相思獨立轉傷神

過彭城

畫角吹殘曉月明
官船撾鼓發彭城
山峯北去青如染
河水東來勢若傾
兩岸菰蒲天共遠
幾家村落屋初成
長歌激烈空懷古
亞父牆頭草又生

爲吳明遠作南野圖並賦

冉冉庭樹春盈盈原野綠鳥弄晝初長人耕雨新足閑時
一冊書坐對南山讀豈不樂吾真淡然忘世俗

秋夜

蕭寺鐘聲到枕邊客懷牢落正無眠才疎自合當時棄親
老惟慙故舊憐蟲語草根秋欲暮風搖梧葉夜如年攬衣
起坐空庭月百感令人思惘然

喔喔荒雞唱五更起瞻北極大星明佳人搗練秋如水壯
士吹笳月滿城江海久慚生計拙干戈深動故園情尺書
望斷南來雁惆悵空令涕泗橫

題溪山圖

峯巒清翠高千丈織女機絲手可攀萬壑雲生春冉冉一

溪花落水斑斑人行樵徑蒼蘿裊大吹誰家綠樹間今日
看圖懷舊隱石田茅屋幾時還

奉同潘友石左丞雪溪汎舟得人字韻

溪水綠生鱗溪山雨後新草藏眠渚鳥花隱浣沙人意適
忘舟遠情歡藉酒頻碧雲莫將合同首隔風塵

送周仲瞻架閣使高麗

萬里三韓國南風幾日程海平蛟室淨天近使星明玉帛
通新好梯航續舊盟歸時應不遠還與雁南征

九日

客逢佳節每堪嗟忽遇君來共憶家醉裏他鄉今日酒眼
中籬菊去年花解吟一老頭如雪學舞雙童臉似霞更憶

明年會何處不知誰復在天涯

余久不與文勉聚語忽薄暮見過評論近詩余甚
有得也且言明日欲還里中特以云別爲畱觴酌
明月在地微風動林吾二人者情真意適或飲或
詠而不知夜之分矣旣酣偶得七言律詩一首遂
用援筆走書爲贈

好客評詩過草堂琴尊畱共晚風涼天邊雲氣不成雨地
上月華渾似霜渠碗羹浮芹葉嫩碧觴酒吸藕花香明朝
別我城西去水色山光引興長

軍中

風咽悲笳送夕禪轅門寂寂令嚴威十年骨肉多離別萬

里鄉關有夢歸寒雨蕭蕭冤鬼哭黃沙漠漠戰塵飛將軍
肯念蒼生苦早決雌雄在此機

泊江上

卸帆今夜泊洲渚颯颯涼風起綠蘋月底扣舷驚水鳥船
頭打鼓賽江神青青芳草悲遊子落落浮雲識故人我亦
少年淹泊旅聊將濁酒慰情親

睡起

匡床午夢鶴驚破簾外柳花飛白雲漠漠茶烟當戶起丁
字樵響隔林聞詩成自刻庭前竹酒熟還羹澗底芹眷盡
江南新漲綠扁舟何處狎鷗羣

姑蘇錢塘懷古詩次韻

弔古上靈岩日暮下琴臺蕭蕭紅葉落采香人不來鴟夷
稱得計句踐亦塵埃

吳宮事已遠王珣宅亦無山鬼話亡國松關夜相呼白露
泣紅蘭青燈照碧蕪

荒邱懷古隧言是孫策墓墓草生輝光零零泣清露想當
立國時英雄稱獨步

南渡中興日君臣此建都共憤太宰譏子胥終見屠武穆
何由死欲聽延秋烏

國亡喬木在烏鳴自關關人隨歸雁遠春從沙塞還怨別
惟宮柳長條誰復攀

山僧講經地玉輦昔曾行寢殿野花落空巖雲氣生敗亡

猶得土千古讓田橫

江西詩徵

卷四十二

明四

美

江西詩徵卷四十二

江西詩徵卷四十三

南城曾煥賓谷編輯

南城曾煥賓谷編輯

明

劉仔肩

仔肩字汝弼鄱陽人明初以文行薦召至京集都
人士詩爲雅頌正音附以已作草昧之初風雅賴
以不墜

登北山

薄言出東郭縱步陟北嶺油雲冒峯岬寒松雜脩挺林翳
景若暝谿迴路猶引崇基擬素志澄淵鑑清影遵險旣易
常臨深亦逾謹朋遊竝登眺妙趣心獨領寄想烟霞濱超

江西詩徵

卷四十三

明五

然欲歸隱

春日與李二文學游城南

浩蕩關河遠周流歲月新
獨醒愁對酒多病怕逢春
楊柳南城路鶯花紫陌塵
若爲聯騎出謂爾謫仙人

別墅晚晴與鄰叟久立

郊原初雨歇散步出荆扉
落日在高樹涼風生客衣
佛香僧舍近江影塞鴻飛
亦有南鄰叟忘言相與歸

荆南江晚眺有感

沙頭寂寂晚維舟詞客重來感舊游
江上夕陽諸葛廟雨中芳草仲宣樓
天連錦水來春色雲暗襄陵起暮愁
回首可憐梁甫意一官牢落向南州

贈張時敬還荆南

隨牒適荆土倦游滯京畿謀生苦拙訥事與心恆違朋儔
一疎闊山川復閒之音問曠莫達何爲遽來斯世故有變
遷歲月成推移顏藻減丹渥衣塵化爲緇稍欣披雲霧復
覩聯珠璣意愜苦不早情深發彌遲夕語厭促漏晨遊恐
斜暉論舊已慨歎況乃重乖離春草滿南浦時花匝郊圻
乖人無爲懽感物悲路岐昔別已三載重來復何時幸茲
書軌同遠邇無不宜逸足志四海羈禽戀故枝言念屬絲
翰聊以敘所思

春曉曲

紫絲複帳流蘇結雲母屏風疊香雪門前嬌柳乳鴉啼暖

漏丁丁曉將徹花枝入簾紅尚小蘭露著衣香不歇江南
行客歸未歸芳草春風滿城闕

公子

玉雪諸公子聯翩出鳳城柳橫絲障綠花擁繡衣明玉勒
迴香騎金丸落小鷺晚酣邀上客歌吹向蓬瀛

夜讌

上相勳庸盛羈人會合難昔曾陪劒戟今乃廁衣冠酒向
佳人醉花隨錦障看篆香凋鴨換銀甲小箏彈內屋開新
色重簾護薄寒旨肴呈海陸妙舞播椒蘭賢達儕梁苑才
華擬建安任情從客狎劇飲樂杯乾門第青春迴星河五
夜闌歸鞍拂華薄零露已漙漙

望闕口號

閭闔排雲寶殿開
千官鵷鷺早朝回
不知誰獻王褒頌
得奉君王萬壽杯

葉子奇

子奇字世傑
龍泉人
龍鳳初上書總制孫炎薦主
巴陵簿
嘗作太元本旨
儒者稱之後
以事株連獄
中以瓦磨墨有得
卽書獄釋續成之號草木子

過嚴先生釣臺

君爲利名隱
我爲利名來
羞見先生面
黃昏過釣臺

塞上過重九

客子光陰似水流
西風吹老菊花秋
今年不用登高去
人

在青山最上頭

題張原琛蓬窗

銀絲魚鱸碧芹羹曾記扁舟越上行今日小軒風味似滿
川風雨看雲生

寓玉清觀

徑草微微護淺沙小山叢竹玉清家牽牛延蔓無多碧點
綴秋光一兩花

長沙水陸洲

長沙城西湘水流客來城下繫孤舟隔江幾樹殘楊柳畱
與啼鳥伴白頭

南唐故址

唐主宮垣集眼鴉垣邊幾座野人家尚餘一片繁華地宜
種紅藍內苑花

天岳新居

道院僧居相與鄰綠楊門巷不生塵落花飛絮無情緒只
解年年斷送春

茅齋新卜小山東野竹盤根舊有叢柔綠近抽三兩箇便
能搖影向春風

石門茅屋

藤蘿抱石門自牢茆屋誰怕秋風高落花芳草共幽獨清
風白晝何蕭騷山中無地看野馬世閒萬事如牛毛不見
崇墉貯歌舞春風容易長蓬蒿

岳陽晚興

洞庭萬頃秋月君山一點晚烟安得幅巾無事酒船吹笛
江天

暮雨漁村春暝曉霜楓葉秋酣人世花開花落山光湖北
湖南

楊褒忠公墓

步出城南門來弔褒忠墓墓高三四尺棠梨已無樹昔人
重忠節尸祝闕崇宇自從兵甲興萬物散風雨碑爲攻城
砲屋作臨衝柱淒涼今日事豈異金源苦塚傍新骨多狼
籍相撐拄饑鳥啄人腸飛過淮河去

過磊石

洞庭五月涼氣多輕風捲浪生微渦小船掛帆不蕩槳後
船來和前船歌月白船頭大魚出天青水底懸星河千里
故人不在眼有酒欲飲將如何

上院判

浩蕩風雲氣英雄虎豹姿飛霜看下令甘雨望興師破的
千人駭橫戈萬馬馳虎符開列校龍節鎮邊陲城曉霜清
角天秋月滿旗山河百戰外人物再生時細柳春營肅崇
蓮夜漏遲威行知不犯事定契無爲公議皆歸德深恩欲
頌詩自慚生也晚況復數逢奇李早汾陽識蘇求太尉知
熱非爐上炙天笑井中窺大業今伊始偏城豈足羈會須
盟券鐵勳業冠彤墀

湘中怨

帝車從此去不見帝車回日日登臺望湘江白浪來

懊惱曲

綠珠酒半酣吹笛對明月金谷樓正高萬騎已如雪

流連樂

歡樂自我事豈復關汝家不知問何罪驚儂張麗華

微嚴道中

經行古官道何處有人家時見荒山脚一川蕎麥花

塘上聞蘭香

大谷空無人芝蘭花自香尋根竟不見茅草如人長

寄履齋

繫池取青天魚向天上游夜靜風不波一痕山月秋

題花木翎毛畫

海棠花未開枝上春禽語東風幾何時滿地飛紅雨
濛濛花上霧五月海榴紅幽禽咲晴晝葉底聽惺忪

漫興

功名富貴兩匹羊且盡生前酒一觴多種好花三百本短
籬風雨四時香

隱居

蒼石紅泉少隱家牽牛延蔓繞籬笆不知滿徑秋多少涼
露西風澹泊花

己亥元日寓舍獨坐對雨

清坐無憀獨客家一瓶春水自煎茶寒梅幾樹迎春早細雨微風看落花

復次仲修韻

春風村巷澹如秋細雨和雲點點愁正是別魂招不返落花流水下溪頭

壬寅重九

白雁風高落木洲人閒歲月水東流山城又是當吹帽數點黃花冷澹秋

縣舍卽事

朝日開衙暮散衙略無一刻及春華偶過縣舍城隍外隨分春風領菜花

岳州歌

綠波晴漾白鼉池郭外人家有酒旗客思獨如楊柳樹春風愁緒萬條絲

宿白羊湖

客思官程意轉迷湘江南去草萋萋待尋無樹人家宿免得中宵謝豹啼

劉秩

秩字伯序豐城人吳元年知崇明州奏罷酒稅及請減戶口食鹽米三萬石有奇民爲立生祠以誣被謫事白棄官歸有聽雪篷集

按明詩綜作秋南集

冬日卽事

縣邑干戈後城空景寂寥山寒雲釀雪江晚月通潮壯士
征衫薄將軍戰馬驕只今邊境上誰是霍嫖姚

裁衣行

裁衣須裁短短衣短衣上馬輕如飛縫袖須縫窄窄袖袖
窄彎弓不礙肘短衣窄袖樣時新殷勤寄與從軍人願郎
著衣便弓馬破敵長驅古城下

東湖女

東湖女兒髻綰鴉清晨結伴來西家碧羅裁衫照秋日香
酥暈臉明朝霞儂家住在大堤曲幾度采蓮湖上宿江南
遊客最關情相思一夜秋波綠

望夫磯

望夫磯頭石如虎望夫磯下浪如鼓于今不見望夫人徒
使行人感前古行人心事莫悠悠亦有佳人樓上愁願使
此心如此石行人遠遊歸有日

和孔侍禮韻

百里京城接暮烟依稀景物似秦川棟花落處風飄樹魚
子來時水滿田賈客蒲帆天際落野人茆屋樹陰連袖中
閒却經綸手擬向槎頭釣巨鰕

贈淮安府知事兼寄經歷

柏府馳聲冠六曹又加春色上恩袍畫船載雨過淮甸蓮
幕迎風看海濤王命祇今寬賦役邊庭從此息刀弓到官
煩語饒從事欲寄新詩愧魯臯

秣陵懷古

別家楊柳正依依回首西風木葉飛鄉夢已隨雲北散客
心先逐雁南歸三秋邊境仍烽火九月征衫尚綵衣莫向
窮途歎牢落料應青眼故人稀

秣陵風物近如何兵後登臨感慨多雲淨石頭秋嶂出月
明淮口暮潮過離人暗滴青衫淚商女空懷玉樹歌忽憶
舊時驄馬客于今白髮老山阿

酣酒狂歌思欲飄久從江國駐蘭橈芙蓉隔浦聽秋雨楊
柳長亭看晚潮過客有時來問字美人何處覓吹簫題詩
欲寫慙慙意搔首西風雁影遙

野牧子卷

釣渭耕莘事若何爭如牧子在林阿橫吹短笛風歛笠倒
跨歸牛雨濕蓑海上嚙韁持漢節山中扣角起商歌長途
我亦歸休者更擬爲樵人薜蘿

雞鳴曲

馬初嘶雞初鳴夜待旦晝兼程昨日晚出長安城今日早
望橋山行東西相去四百里明日山北還晨征不緣薄宦
苦相縈何得如此勞吾生君不見路無窮人易老離家不
如在家好吾家萬里在江南回首天涯歸不早

鄧學詩

學詩字崇雅泰和人性至孝元季負母避亂遇賊
斫之幾死復遇渠寇知爲儒者口占一詩命和喜

而釋之明初以薦授固陵稅課使徙平陽引疾歸
號疾退子有詩集

口占和渠寇韻

鐵馬從西來滿城盡驚走我母年七十兩足如醉酒白刃
加我身一命懸絲藕感公恩如天未知能報否

賀守約

守約字約束別號禮齋永豐人元末隱居以行誼
爲鄉里倡學者宗之明初薦授永新教諭陟光山
致仕卒

重遊武功山

勝日武功山下路碧桃花落澗泉肥道人新憐雲邊屋童

予猶看刼外棋，縱嶺風清笙鶴遠。昆池灰冷石龍飛，此行欲借薇垣露爲寫前遊壁上詩。

程國儒

國儒字邦民，歙人。徙居德興，元進士，授餘姚判官。攝紹興縣錄事，洪武初知南昌府，被逮，暴卒。有雪

崖集

按通志：選舉內作德興人，茲據明詩綜作歙人，徙德興。

越城謠

越州城城何高，四十五里之周遭。窪地填爲基，坡垞鑿成濠。白晝鞭笞夜擊埵，石民之骨灰，民膏越城雖高，越民勞越民勞，勞未已。我田未耕，又科米。忙忙築城歸種禾，又恐無米供官科。禾苗未清得秋雨，城吏打門夜如虎。爲言雨

後新城摧要我荷鋪城上來城泥不乾不敢回又恐夜半
聞驚雷城頭一雨城一動越民登城向天慟民心似與雨
有讎天意實謂城無用當年當年天下平天下無賊越無
城乃知在德不在兵

信州糧謠

信州糧糧何艱十鍾一石萬里閒朝發錢王隄暮過嚴陵
灘柁尾白浪如銀山朝渡蘭溪州暮宿龍邱灣峻如牽車
上鬼關督吏馳檄夜傳箭布帆無風河水乾去年糧船未
及岸今年又運八百萬只知彼地荒不知浙東天亦旱只
知彼地饑不知役戶家無飯家無飯儂莫愁願化鐵騎爲
耕牛願銷鋒鏑爲鋤耰戰場闢作畎與溝壯士荷甲歸田

疇風雨時調禾黍秋禾黍秋飯不足浙東又移何郡粟

次樂秉德韻

傷心世事淚潛潛已付餘生作等閒
羶乳尚能持漢節雞鳴那得出秦關
黃花時候多新酒綠樹門庭是故山
日夜思親頭盡白何人爲賦大刀環

客新安仍用前韻

溪頭新雨水潺潺行役寧消半日間
棧影連雲通五嶺柝聲和月出三關
官營白酒初成市客舍黃塵不見山
撫景豈勝懷古意盡言天道似循環

章復

復字彥復號復齋鄱陽人仕元歷行省檢校洪武

元年下百粵簡授全州同知全民不事農編農圃
通諭身爲督勸又述湘謠十章以感之尋擢全州
守調保寧乞致仕特恩與乘傳歸

和韻答劉彥昂

四載懸車鄙水陰暮年榮際海波深承恩有賜鳩爲杖知
已無如鶴與琴老去只存三徑菊生來不識四知金自從
辭祿還鄉後短髮無勞筆載簪

王沂

沂字子與泰和人元末與弟佑俱試有司卽棄去
洪武初徵爲諸王說書上書論事授福建鹽運司
副使以老辭歸有竹亭遺稿

按羅念菴集
作秀都人

送上清張叔大鍊師東還

芒蕩有氣浮天關真人乃在圮橋間功成往事赤松子心
與浮雲如等閒上清億劫元教起坐引諸天黍珠裏時聞
仙子御風來身着山中紫霞綺東海塵飛二十年仙凡消
息兩茫然守關人識青牛去渡海書逢白鶴前五陵八百
遺仙記思欲攀天閭天帝三尺青萍手可揮一品銀章肘
先繫笑把芙蓉花相期訪蓬島不見河上公空懷橘中老
大明治世龍溪秋乍來倏往應難留月明後夜碧天淨笙
鶴遲爾緱嶺山頭

遊青原山次隆大古謝子方

逸客淹螺浦尋僧問鷺峰水流通雪竇谷響應霜鐘幻跡

雙荆樹香風五粒松追隨成信宿感爾意重重

送謝子良驛丞之京

水驛論交舊著名春城分袂若爲情空羣音驥長千里惜
別流鶯更一聲白下雨收梅子熟清江風過柳花輕歸船
暫泊應回首五色雲中是玉京

黃堂冬夜詞呈全子仁大參

簾底移琴錦幄張梅花枝上月如霜羽書忽報諸州捷敲
折珊瑚一寸長

仙源秋曉

遠是青山近是林仙源秋色雨中深煎溪不是桃花水縱
有漁郎無處尋

大孤山次舉善茂方韻

聞說揚湖好春舟更一灣江豚乘水上野鷗落雲間勝景
疑三島靈祠俯萬山若逢王子晉笙鶴定相攀

望南屏山同呂仲鉉

游目南屏山逍遙稅塵鞅清溪亂流涉疊嶽緣雲上輝輝
瀑泉落隱隱天籟響荒塗理通塞虛室靜宏敞中有餐霞
人長吟御風想不乘緱嶺鶴還顧漁郎舫芝草甘若飴雕
胡大盈掌雖爲頽齡駐亦忌流光往永懷山中遊觀化歷
清賞

過臨江訪彭聲之

金鳳洲邊路維舟重憶君江虛秋氣入沙淨曙光分斷鴈

前汀起鳴鐘隔岸聞因過鑑池上詩思亂愁雲

秋江送別圖題贈黃通守允中

秋江水落楚天低目送歸船渡聶溪莫道浮雲千里隔君
山只在洞庭西

由竹壩望錦川桃李春色如畫有懷陳邑令

涉淺上輿梁憑高眺鄉縣灼灼桃李花層層遠皆見兵餘
草根盡此地芳菲徧氣暄雉雙雒景淑鷺百囀邑里齒故
繁弦歌俗丕變懷賢思如渴敷政速於傳孰是潘安仁而
猶宓子賤

九月十一日鄰寇逼境倉皇南渡感賦

鄰邑舉烽燧長驅寇南平中宵始聞警挈家遂遠行倉皇

具舟楫所志惟弟兄初營暫涉水將復還邑城歸塗逼煙
微戎馬亂縱橫父子兩隔絕慘哉生別情慈親力疾起負
振同遐征饑分路人食渴飲田婦羹兒童不遑息蹢躅昧
前程爲謀苦不早臨難迺無營前事杳難測逢人空涕零
存亡有至理瞬息且偷生

過三顧山

白下水南峙青山多好峯曾攜玉拄杖細看金芙蓉松杉
百尺圍藤蘿千萬疊爾非盧度仙精神乃相接倏然巖谷
底彷彿元圃邱履我舊行跡何殊梁家遊松風落松花片
片勿輕掃更欲三顧樓同君采薇草共守鴻鵠志豈隨龍
虎爭時來拂衣起奄忽成大名紫氣浮關門白雲麗宮闕

照見遊人心惟餘碧峯月

幽居同劉韶賦

春泥門巷雨聲多
澗浹荒畦露淺莎
石砌落梅疎映竹
鑑池流水細通河
坐深還愛青氍舊
老至其如白髮何
海內太平忻有象
詩成聊復醉時歌

壬寅紀異同劉以和

壬寅仲春天雨雹
南屏城中盡驚愕
初從屋瓦亂崩騰
散入階除更跳躍
兒童不識挽衣盛
兩兩相看忝相謔
老年閱歷憂患餘
却顧兒童淚雙落
春秋咎徵不一書
茲事班班宛如昨
自從兵變十年來
瀕洞風塵巨沙漠
奮當車轍小物爲
天理何嘗宥元惡
竊聞李郭收兩京
元氣依然萃

光岳旄頭夜夜燦中天風虎雲龍聖人作嗚呼風虎雲龍
聖人作吾徒勿憂在溝壑

謁蘇雲卿祠

古道風沙際荒祠草樹閒崇文今日盛辟世幾時還薄宦
真餘事虛言頗厚顏翻思徐孺子清節照湖山

淨居寺

躡雲來駐錫拓地此安禪曾讀傳經錄因參不二天松陰
山四合雲影塔孤懸消歇同人世憑軒思惘然

送達兼善俞憲河南

袖有新封事囊無舊賜金兔園司馬賦魏闕子牟心秋菊
誰同采燕鴻好寄音故人如問我爲誦白頭吟

送蕭九齡赴淮西

漢將傳華冑，蘇卿敝黑貂。曳裾非我事，置醴遠相招。楚甸春多草，淮流日雨潮。空吟小山賦，藜桂影蕭蕭。

越上早行

青鞋三十里，草露惹衣斑。潮落曹娥渡，雲昏禹山秋。聲黃葉裏，天影白鷗閒。欲問錢塘路，漁家半掩關。

瓜洲

烟際繫孤舟，蘆花滿櫂秋。江空雙燕落，天闊一星流。急鼓西津渡，殘燈北固樓。商人茅屋下，沽酒話揚州。

金陵

六代帝王州，宮烟滿石頭。星河天北轉，江漢水東流。步絕

金蓮兩歌殘玉樹秋白頭有漁老猶說景陽樓

度三花嶺

絕壁三千丈荒烟八九家黃茅青草瘴黑質白章蛇橄欖
高懸子芭蕉倒吐花嶺南一回首何處是京華

寄曹子貞

黃金臺下舊騎驢曾記含香侍玉除禹穴有人尋李白甘
泉無賦似相如潛鱗解舞湘靈瑟病鶴難傳閬苑書遙想
論思翔集地紫薇花點綠苔疎

送馬伯庸

社燕秋鴻十二春相逢疑是爛柯人公車未索長安米野
服曾沾輦路塵日麗天門嚴虎柝波搖宮瓦動龍鱗懸知

江詩存 卷四十三
進講金華殿五色雲中拱北辰

小莊道中

客路千厓裏春風二月中
虎蹄荒徑少鶯語故鄉同澗水
縈迴綠山花自在紅物華空滿眼
去意只怱怱

武山

路轉巔崖虎鼻峯上方日晏始聞鐘
晴嵐密護巖西竹香霧輕浮澗底松
山果欲凋還其采林僧久別乍相逢
玩竒行繞燒丹處拾得仙人九節筇

題王節婦卷

夫凶姑已葬二子幸成人
甚日歸泉下還天薄命身

廣陵岳宮登瀛橋爲王高士賦

登瀛橋上登瀛客曾向瀛洲采玉芝鸞鶴雲閑朝斗夜魚
龍波靜步虛時杯浮翡翠蘭茗影袖拂珊瑚鐵網枝安得
琴高騎赤鯉傳書海上問安期

次韻宋誠夫上邨書事

日邊音問及滄浪知有飛鴻拂建章黃帽折腰慙鄭老青
雲回首憶韋郎持竿寧解遮西日賜履還看出尚方惆悵
平生一杯酒鬢毛林葉兩蒼蒼

甘淵

淵字伯清號靜軒南豐人少植志節元末辟本州
學政不就洪武二年以經明行修薦授本縣訓導
再調潞城縣丞卒有滄溪詩集

題仙源雲仍家譜

炎祚當年德業隆
細編家譜見遺風
忠良籌略隳奸佞
顓臾圖愍幼冲
梁苑綠莎深夜雨
吳宮白塔倚晴空
岳王墳畔西湖路
千載登臨恨莫窮

羅以明

以明字善蒙號矇叟廬陵人七歲善聲對十二能爲辭賦明初隱居不仕以子汝敬迎養京師見皇

太子於文華殿尋歸

按明詩綜作名善蒙吉水人

感興

勳業飄零梅子真
江山誰與訪遺塵
艱難獨不悲前事
慷慨徒勞憶故人
太乙圖書元在漢
東周禾黍半歸秦
晴天

玉筍秋風上欲薦蘋花淚滿巾

曾 魯

魯字得之新淦人七歲能通五經稍長以文學聞
洪武初纂修元史編類禮書授禮部主事以詰安
南貢使爲太祖所器超拜禮部侍郎引疾歸道卒
有守約齋集

贈黃道士還九宮山

我家翠玉山南陬君居蒙頂最上頭相望欲識嗟無由搖
搖心若風中旂君從少年慕遠遊麾斥八極隘九州下視
起滅如浮漚九宮山高明翠蚪真牧之子世莫儔君居其
閒業清修五十餘載無悔尤翠華昔駐鸚武洲承恩召對

黃鶴樓數陳屢荷天語酬大官醉以白玉甌去年弓旌復
有搜麻鞬徑入朝冕旒神臬繁麗不肯畱還山中夜稽首
求山中之人書遠郵兩餘黃獨苗新抽琅玕芝草弄春柔
不歸負此巖嵒幽龍江送別情悠悠鄉人歌作商聲謳

曾子修

子修名業以字行臨川人洪武初徵赴京師召對
稱旨除監察御史七年太祖見慈烏羣飛命賦詩
立成十韻上大悅因命再賦之在臺中謇諤不羣
致仕歸有桃源文集

眉山雨霽

好峯當戶聳岩巖雨過青青物色嬌四象二儀和氣洽千

崖萬壑淡煙消花口宿潤紅如染樹擁晴光翠欲飄講筵
幾回看不厭數聲啼鳥隔林樵

石橋雲閒

雲與幽人長共閒相看終日足怡顏卷舒有道風雷外縹
緲無心巖岫間懶逐蒼龍騰碧落甘同白鶴在青山蒼生
想望應如渴願作商霖爲濟艱

桃源牧唱

郊原風景異尋常稱爾來斯草正芳十里松風傳笛響兩
崖花露濕衣香狂歌白石心偏悅飽看青山興愈長冷笑
紅塵車馬客半生奔走爲誰忙

玉溪漁釣

白鳥忘機共歲寒浮名須向此中安水雲鄉裏塵心遠風
雨磯頭地步寬熊兆何時來渭水羊裘終古傲嚴灘寵榮
雖有千鍾粟曾似滄浪一釣竿

龍 鐔

鐔字德剛萬載人洪武初以薦召對稱旨隨春坊
官入直講數年奉使治水視軍悉以利弊聞特授
浙江按察使爲忌者所中左遷歸起爲晉府長史
靖難師起徵晉兵泣拒之文皇引兵攻城不克既
立械下獄不屈死

破械寄家弟

一陣西風破鴈羣兩年消息未通聞祇圖宦達從先進豈

料才疎賁聖君黃壤好將收白骨青鸞無復駕紅雲信知
秋雨梧桐後剪紙招魂誦祭文

胡雲端

雲端字騰霄新淦人銓裔孫洪武初以貢舉聘修
元史後廷試第一官禮部主事定禮儀編孝慈錄
稱旨遷浙江副使以疾乞歸卒

和曾得之回京師韻

天塹東南聳石城龍蟠虎踞壯神京輿圖不改山河舊日
月同懸海宇清歌舞滿樓凝王氣闔閭徧地樹風聲幾回
遙想繁華處有日重來被寵榮

奉詔歸里

半世功名一旦收君恩如此更何求家貧到骨原非病詩
債關心不是愁樽酒且須陪客醉廟堂有待爲民憂乘閑
且理棲遲事付與煙波任去留

玉梁觀

異境闔琳宇深溪臥玉梁雲山莽回互水月淡微茫谷暗
紫蘿合磻春瑤草芳野橋通石棧仙奕隱茅堂尋壑聞猿
嘯飛空看鶴翔何時脫塵鞅棲遲詠洞章

周所立

所立臨江人善口辯能詩跣跣不羈嘗作僞漢上
梁文爲時所傳明初以臨江十才子同梁寅張美
和等徵入京師當事者以其輕脫僅得臨江教授

歸

哭定住

綠錦池頭舊使君近傳消息不堪聞的盧竟死檀溪險鸚鵡翻成鄂土墳蒿葉蕭條生夜月棠陰迢遞起秋雲陳琳老大頭如雪無復軍前草檄文

清江重鎮收旌麾常憶蒸鵝餅餠時文采風流三國士才情穠麗六朝詩石龍劃起波濤變金鳳翻從澤國辭千載羊公遺愛在行人揮淚峴山碑

張美和

美和名九韶以字行清江人元末累舉不仕洪武初以薦歷翰林編修致仕歸帝親爲文賜之復與

錢宰等徵校禮書書成遣還有吾樂山房稿

寄子定辭任

大府陳情遇好音
辭歸得請勝腰金
南山不負幽棲志
北闕空懷仰望心
爲客經時黃葉落
思親終古白雲深
家人念我如相問
爲說蕭蕭雪滿簪

歸隱

歸來江上看青山
種柳成陰漸可攀
舊夢任隨流水去
此身相伴白雲閒
錦囊書帙收千卷
金井丹砂貯九還
畱得玉堂揮翰手
賸題佳句落人間

施原卿隱居

虎瞰山西舊隱居
披圖細玩果何如
連峯沓嶂青無際
明

月清風意有餘
門外抱琴能至
客石邊垂釣可
求魚也知原上
多佳趣更闢東
廳好讀書

宋一俊

一俊字尊士新淦人
洪武初與張美和曾魯同辟
授中書舍人數上書言事
乞歸以文章自娛再召
不起有詩集

羊角峯

山名羊角半空起
勢欲參天高未已
春來雲氣深濛濛
或捲或舒崖谷裏
白衣蒼狗變化多
下有靈物潛山阿
不向早年作霖雨
其如天下蒼生何

百華寺

上人安錫處長在覺城東適性忘塵慮談禪慕祖風一龍
藏石鉢孤鶴唳花宮猶憶相逢夜滄洲笑語同

太和寺

躡屐步山阿空門是太和殘僧經亂少野鳥競春多壞壁
生苔蘚頽碑長薜蘿夕陽紅影裏回首一悲歌

送姚御史伯良按浙江

御史分符按浙江口銜天語上官航頓令北闕文星少莫
畏東吳水驛長鳳蓋九重深雨露豸冠千里肅風霜佇看
激濁揚清後贏得君王賜龍光

別胡子秦徵辟赴召

渥洼神駿難淹留丹山鳳鳥不可求吾州俊彥似君少胡

爲久倚城南樓元鶴銜書下天闕應朝使者乘輅發郡邑
征行急似星正是楊花暮春月沙頭餞別情更與南風吹
浪送舟頻茲行若侍君王側勿云漁釣江之濱

別鄒孟爵赴京

江頭柳色如金黃錦袍遊宦辭家鄉官河昨夜泛新水搖
搖畫舫經滄湘銀杯餞別香醪滿陽關三疊歌聲長東風
曉拂杏梢軟疎雨晴飛桃浪暖人生會少別離多欲別不
別情如何男兒用志在忠國莫將心事懷煙蘿我有一寸
心如鐵送君直上黃金闕黃金闕下展英猷五色才華耀
同列天街日日去朝天花底朝回環珮聯從容故舊若相
問爲言老病還依然

寄周所立

老子春秋過楚邱聲名此日滿皇州草書不讓諸王帖珠
履寧千萬戶侯泮水東風彈綠綺金川皓月看吳鉤安車
早晚來相召未許盤墩久滯留

挽練子寧

擎天手段忽云亡淮水東流倍慘傷苦志讀書身有分忠
心報國死何妨秋風寂寞閑金榜夜月淒涼冷玉堂見說
東門有黃鳥哀聲猶自畏三良

送姚伯良之廣金城

姚君家住金川側早歲才名動鄉國清江太守頗相知飛
書薦作朝天客桃花三月錦帆開飄然直上黃金臺黃金

臺前親射策天子一見稱奇才虬髯如戟氣如虎玉立身
長衣楚楚時賜鹽官不肯爲特領金城坐開府金城千里
去路遙巨鎮所屬當蜚徭鐵騎穿雲山歷歷寶刀耀日風
蕭蕭君今此去別鄉土我欲畱君君不住豪來拂我雙龍
泉醉眼摩挲爲君舞爲君舞其君語莫遺年華負壯心好
將事業降餘豎楊柳條柔晚帶煙桃榔樹老朝含雨巡邏
歸來揮彩牋因風好寄梅花邊廣西驛道多歸使莫令悵
望心悠然

涂 綫

綫字守約又字孟規宜黃人洪武初擬上時事策
以病不果而卒有涂子類橐

兵後述懷

世亂遭漂泊塗窮轉寂寥每懷經濟業無補聖明朝歲月
戎機失風霜客恨銷故園春草綠隨意狎漁樵

擬峴臺

路仄埋花草城高接薜蘿月生滄海闊雲傍石樓多薄暮
聞金磬乘閒散玉珂雄州餘勝概回首重來過

鄒矩

矩字元方宜黃人博學工古文詞與同邑涂幾齊
名洪武初以通經儒士薦授南城訓導課士有賢
聲有文集

雲關嶺

朝從雲關遊暮向雲關宿仙人駕雲車遺我雙白鹿誰吹
紫鸞笙清響在林谷

周魯章

魯章字文瞻新喻人通春秋兼究陰陽山水之說
工篆隸行草書郡縣迫以應詔洪武二年授承事
郎吏部主事以老病告歸上賜簞笠農具爲作明
農軒貯之

題李持義客子光陰集

喻城西頭李徵士才情不是尋常者坐閱光陰擬去非退
思記述同司馬況經喪亂避鄉邑備歷艱危到原野憂時
撫事淚如雨扣劍商歌恣摹寫荊州賦就辭愈工夔府吟

成和尤寡聖朝更政時再清歸築遺基更瀟灑柳樓醉酒
承朝夕華屋金丹伏冬夏已擬董奉重廬嶽更學文公興
洛社興來嘯咏益自適入掌明珠屢盈把神情沖澹逼韋
柳氣格高明竝岑賈吁嗟天地等逆旅歲月堂堂不相假
倘非隨寓畱妙墨遺事那傳百年下當今敬老禮數優使
者安車豈君捨早聞製作被弦歌郊廟從容陳頌雅

張琬

琬字宗琰鄱陽人洪武初以貢試太學授給事中
調戶部主事以召對尋擢戶部侍郎上疏言時政
請蠲民租太祖俱納之年二十七卒

敘鄱陽風土制

門倚東湖小浦濱春來景物益精神百花洲接新橋路五
老峯連薦福雲風度鼓鐘孤寺曉煙橫楊柳萬家春風光
尚想還依舊上苑題詩得具陳

高善

善字達善除千人洪武初應禮部試以親老歸有
市隱軒集

題朱氏南隱

良友不易得斯文復誰親彼美考亭裔況爲南郭鄰髻亂
合素志及壯情益真避難各東西歸來闢荆榛卜築愧我
後安得忘里仁屏跡闔巷僻怡情山水濱花木動成列琴
書清絕塵披閱感興詩遺墨良足珍至理寓羣物永歌發

清淳修德勿自畫庶以光前人

劉琮玉

琮玉字潤芳鄱陽人明初以純孝稱博通經史有
清華集

巖石山

鳳凰岡頭巖石山巉巖截立溪之灣深根下厓蛟龍窟絕
嶺上參虎豹關古柏蒼松擁車蓋野花翠蔓成錦斑爲經
岳將曾題品自此名畱翰苑閒

答陶友靜

寒山陶處士冰蘄自爲心石逕幽花瘦茅簷翠蔓深臥聽
鶯轉樹閑數鵲歸林不到芝城久春來爲苦吟

周銘

銘字仲彝號可菴寧州人精經學不願仕進明初
教授里中稱可菴先生有效顰集梅花百詠詩集
石嶺雲橫

磻磻幽岑嶽嶽寒垂陰布影弄氤氲若非洞口蒼龍熟安
得山頭鐵騎屯夜嘯孤猿成獨占晝眠閑鹿謾平分也應
變化爲霖雨潤及山靈功莫論

李士奇

士奇字朝章奉新人洪武初以經明行修舉本縣
教諭修建學校規制自是始備

百丈猿聲

雄峯翠嶽與天齊中有元猿日暮啼澗底一聲青嶂曉風
前長嘯碧雲低飄飄遠逐鯨音盡嫋嫋還驚鵲樹棲若過
林端觀劍術冷泉巫峽草淒淒

黃用泰

用泰峽江人洪武初以明經授臨江教授

長湖古松行

長湖廟前古松百獨留一樹高崔嵬幾同畫者睨其下吮
筆欲落還驚猜蛟龍陸起雲霧黑真宰瞑迷愁不聞松下
丈人性所諧孤操與爾窮年偕有時掃雪待白鶴長吟六
合清風來清風冷冷殊不惡要與相從老邱壑君不見古
來梁棟材青黃黼黻祇自災

漢溪扁石歌

漢溪扁石從何來，槃然屹立江之隈。豈初元氣此凝結，烈
風萬古吹不開。或疑天星墮斯地，光怪從茲匿江溪。不然
江水蕩激閒，那得盤根尚如此。靜看不倚亦不偏，貞顏固
質何蒼然。當時女媧若相見，應拜持之升九天。寥哉年代
知莫數，但覺怪形如伏虎。尤恐冥冥風雨時，一夕奔騰渡
江潯。

登員嶺紫霄雷壇

員嶺之峯高插天，我昔欲登今幾年。一朝乘暇日著屐窮
攀緣，颯然天風起西北。吹我直上山之巔，山巔之宮衆仙
宅。帝令掌握風雷權，我欲藉之叩重元。民有痛憤寄所宣

蒼天本愛民胡令以旱爲我癘爲我癘却恐人骨無由痊
冀令下界蕃五穀願降沛澤周八埏

長湖芳堤晚眺

地接西江遠源通蔗境長風波驚浩浩雲木見蒼蒼漁立
晚烟外人行夕照傍誰能揮彩筆爲我盡纖芒

玉笥山

翠聳層霄六六峯青天削出玉芙蓉崖懸百尺飛流水松
老千年走蛻龍採藥豈無仙客遇著棋應有野樵逢欲尋
金鼎燒丹處多恐年來葛井封

彭 鐔

鐔字存節號主一奉新人洪武初以經明行修舉

本縣訓導

雲峯

簫鸞已去杳難攀萬里雲霄見兩斑獨駕靈風超物表空
留陳迹向人閒巖扃盡鎖藤蘿合薜磴寒吹鶴翅還下界
蹄涔空滿地仙遊誰解覓元關

自天民

天民鉛山人洪武初以明經任本邑訓導教人有
方御史葉孟芳薦其才可大用召至京授肇慶知
府

梅雪堂

皎皎孤山姿皚皚寒空雪二美喜合併幽堂更清潔君子

秉彝性平生勵高節閒居得自如所好非媚悅豈無桃李
花榮耀終衰歇願言保堅固商鼎資調燮

何彥修

彥修名勛以字行一字雲槎新喻人治易學洪武
初以太學生分教東萊後辭職歸屢徵不出學者
稱西邱先生

題喻元凱清隱堂

秀水東邊結構幽林巒瀟灑勝滄洲花晨簾捲青山曙月
夕琴橫碧澗秋賀監每懷湖曲隱杜陵常愛漢陂遊交情
獨負過從約閒卷題詩愧白頭

周軌

執事孟同臨川人後斯裔孫洪武初舉明經知新
河縣有惠政秩滿歸復召主江西鄉試校定書傳
會選書成賜金歸有新河集

東征

郊野積元陰白日忽淪沒驚風西北來邊騎何馳突悲君
貞白姿永訣在倉卒玉顏膏野草何處收汝骨恩愛豈不
懷貞烈誰能越蕭條風塵日紀載多所闕曷以照君心惟
應城上月

棗亭春晚

昨日花始開今日花已滿倚樹聽嚶嚶折花歌纂纂美人
浩無期青春忽已晚寫盡錦箋長燒殘紅燭短日夕望江

南綵雲天際遠

白沙送別

當年小邑盛繁華，疊榭層臺夾白沙。
竹深時聽尚書履，花密頻過相國家。
夜月霜明九華帳，春風雪點七香車。
臨水佳人抬翠羽，隔簾嬌燕逐飛花。
奄忽草堂巢翡翠，重來勝地入蒹葭。
豪華一去如雲往，空有寒沙對惆悵。
征南駐馬立西風，落日寒烟起漁唱。

秋思

倚窗紅燭淡秋光，鳳帳流蘇滅夕香。
機杼隔花聞翠戶，轆轤臨水凍銀牀。
秋風紫塞書千里，夜月清砧淚數行。
望斷金鞍秋又杪，芙蓉零落玉池霜。

夏日畱田家

停午暫休騎道謁投田家風株帶暝姿高樹亂啼鴉田翁
喜客至爲摘園中瓜解鞍藉莓苔移席掃落花相畱至夜
分烟月石林斜相如方病渴歸路茂陵賒

秋日汴京同馬希穆登上方琉璃塔

東出榛莽開宮城何窈窕悲涼金故都秋日荒臺沼浮屠
山苑邊上跨清虛表琉璃半莓苔五色猶皎皎累恩映落
花觚稜却飛鳥崑崙倚戶陰海色當牕曉珮聲河漢落展
齒天香繞野夫方畱滯塵事何時了去漢春已深游梁秋
又杪登高慨搖落令我憂心悄飄飄茂陵客高興秋天杳
絲毫不勝寒仙露知多少落日望江南一點青山小

甲辰三月歸西村

官舍柳花飛羈人謝病歸干戈未定息俎豆焉可爲以茲
理還策歸臥南山陲東皋花雨過流水綠生陂聒聒青蛙
響嚶嚶黃鳥啼到家能幾何又告將農時山田與弟耕春
酒任婦攜逍遙田野閒日暮返柴扉龐公鹿門志劉表安
能移

題王金吾所藏徐熙秋荷鴛鴦翡翠圖

江南畫史誰第一徐熙寫生妙無敵寶軸多藏衛霍家香
幽盡貯金張室憶昨華情水殿西夜深輕輦隨風移清香
冉冉落歌佩秀色娟娟侵舞衣曉來宮闕秋風起翠倒紅
歌玉池裏不禁搖落恨無窮驚歎年華逝流水芙蓉小苑

曲江頭烟景蕭疎異昔遊
披香露冷鴛鴦怯太液波寒翡翠愁
將軍留客多幽暇清簾疎簾時看畫
就中宋玉最多情
秋思都將綵毫寫

題孫氏遺墨軒

宣文學士吾季父
草書往往追懷素
玉堂多暇日
臨池方駕長
沙美無度
聞道尊公居豫章
亦以能書相
頡頏
錦囊長紙霜玉潔
清醉時時臨數行
雲霄恍若鸞鳳翥
風雨歛起蛟龍
驤宣文已矣君未老
一字可直黃金瑤
山陰別後驚捐館
零落狸毫并象管
白鵝池冷綠苔深
銅雀硯寒清露滿
吾廬兵後住江村
玉堂佳帖無一存
却憶君家文獻在
香奩犀軸付諸昆

題大長公主林館

主家林館玉溝西，楊柳芙蓉映舞衣。
玉沼萍開魚上躍，繡簾花妥燕低飛。
微風翠輦宮中去，淡月霓旌苑外歸。
四海昇平當此日，萬年行樂莫相違。

宴南市樓

帝城歌舞樂繁華，四海清平正一家。
龍虎關河環錦繡，鳳凰樓閣麗烟花。
金錢錫宴恩榮異，玉殿傳宣禮數加。
冠蓋登臨皆善賦，歌詞只許仲宣誇。

詔出金錢送酒壚，綺樓勝會集文儒。
江頭魚藻新開宴，苑外鶯花又賜醺。
趙女酒翻歌扇濕，燕姬香襲舞裙紆。
繡筵莫道知音少，司馬能琴絕代無。

晚歸

苑外金波映水天，歸驄蹀躞暮江邊。
鳳皇臺閣初含雨，燕子人家又禁煙。
詩寫桃花歌扇底，酒攜楊柳舞樓前。
請看秋雨臙脂井，好醉春風玳瑁筵。

春陰

梨花門巷泥滑滑，楊柳窗戶綠陰陰。
軒車不來又幾日，風雨相思勞寸心。
舒州紅稻宜晚飯，采石碧酒供滿斟。
故人何可久不見，我有新詩思其吟。

過燕都故宮

八月金輿度玉關，芙蓉零落後庭間。
西宮無復羊車過，南苑猶疑鳳吹還。
承露金盤留海上，廣寒瓊戶鎖人間。
翠華

此日知何在黃葉蕭蕭萬歲山

龔 墩

墩鉛山人元末以明經分教廣信洪武中詔舉儒
士爲四輔官墩與焉以老乞歸復召爲國子祭酒
有鵝湖集

題耕樂圖

賈將軍才且雄右手挾槊左掛弓用如鵬鶚搏秋風狐兔
不敢藏蒿蓬偶辭朔雪望南斗小試良才醺溪口十里朱
旗畫鼓迎三年白帽青衫走良田百畝溪之濱徼巡警息
民風淳花村晝閑綠野闢山犬不吠犂牛馴將軍不嫌祿
厚薄公暇應能事耕鑿體倦那知有苦辛心閑自以耕爲

樂小麥青青大麥深平疇水滿秧浮鉞農家歲計在一飽
一飽寬盡將軍心薊溪之濱有逆旅野興畱人不能去布
穀啼開綠樹煙鷺鷥飛斷青山雨將軍底用身親耕居官
所期教化行民有恆心有恆產放僻邪侈何由生吾家老
遂誰能續解使豪強變雍睦潢池赤子休弄兵刀劍從今
盡牛犢

瑞洪夜泊

三月江南雨滿湖魚吹花浪鳥相呼疎燈照水夜明滅遠
樹入雲山有無水國田礮人雉草酒船風靜客携蒲柳陰
不見垂綸者却道烟波是畏途

題祝洞天薊溪小景

林屋陰深鎖綠苔，碧山當戶小樓臺。
眼前此景不易得，客裏好懷先自開。
鬼谷已難求彷彿，天冠猶解寫崔巍。
靈峯未必無佳處，怪底遊人不再來。

鬼谷，天冠皆薊溪山名。靈峯則上饒之山也。

題煮詩軒

高人心不負幽期，小結華軒要煮詩。
夢熟池塘春晚後，酒醒牕戶月來時。
大羹不和杯中味，獨壘長纒瓮裏絲。
誰謂滿橋吟更苦，寒風雪夜歸遲。

雜咏

越王臺上鷓鴣啼，七國岡頭滑滑泥。
欲識故人無限意，晚烟疎雨畫橋西。

女兒港阻風

老屋疎籬半掩門，斷烟絲柳幾朝暝。雨昏湖口生春水，天入江東有暮雲。山翠欲從青鏡滴，眼波如恨寶釵分。豈無漁笛蒼茫起，垂老飄零不忍聞。

朱宏祖

宏祖字彥昌，臨川人。善詩歌。洪武初，以明經舉官都稅大使。有東皋舒嘯集。

送御史大夫鄧公西征

今代麒麟第一功，從龍飛渡大江東。彤弓錫寵專征伐，鐵券銘勲誓始終。龍虎親軍遙動地，鳳凰臺閣遠生風。不知幙下誰參佐，珠履三千盡石洪。

環溪亭

一曲清江抱畫闌。八窗如在落星灣。紅塵隔斷花香外，白浪飛來鏡影間。蝌蚪舊藏書帙淨，蜻蜓長立釣絲閑。何由動我山陰興，却棹扁舟雪夜還。

周石

石字公明，號溪園叟，吉安人。洪武初，官訓導。

按貴溪有

周敬字孟敬，洪武中官經厯，別是一人有詩見後。

琴清軒

橋西樂幽邃，虛室絕瀟灑。有美軒中人，抱冲志元雅。朱絃紐枯桐，一曲美清夜。風泉響初定，竹露浩如瀉。鶴唳碧雲端，鷺吟秋月下。古來山水操，俯仰知音寡。長笑聞溪濱，孰是同心者。

夏日襟興

一片殘紅落紫苔
笙歌無夢到樓臺
山雲畫鎖石橋斷
溪雨夜添春水來
江上客扶歸馬醉
柳陰人喚打魚回
不知上苑花開否
無分行看羯鼓催

胡子昂

子昂南城人能詩嗜飲字體逼趙松雪因自號竹
雪後隨邊將守禦興和失守死之

按子昂當是字名無可考

歸田詩話載其一詩并敘錄云云佑以洪武中入仕迄洪熙歸田萬歷杭州志稱佑與子昂永樂初以詩禍同開錦衣獄蓋明初人也

和瞿存齋寄題竹雪齋韻兼柬唐太守晏僉憲袁教習

春秋家學疇可匹道德文章追六一吁嗟白壁點蒼蠅塵
尾祛之猶狺狺一從遊宦閱暑寒桐江拋却老釣竿劬書
磨盡萬鈺墨狂吟題徧千琅玕山陰正與剡溪對蘭亭曾
把烏絲界霜猿抱樹恣盤拏雲鶴遊天隨變態凝神運腕
任筆端硯池飛雨暝作團筠陽太守有篆癖山東僉憲無
文酸袁安愛以菊爲主墨汁淋漓能貌汝老夫撚斷殘莖
鬚笑看邊城六花舞麴生於我最有功一醉四座生春風
箇中真趣知者寡此意寄謝存齋翁

郭矮梅

矮梅江西人

詠炭

樵青黎面學崑崙斫月燒雲樹欲髡萬竈黑烟灰出劫一
星紅燄火還魂汚身若有仙翁幻報國今無義士吞曾似
茅齋風雪夜地鑪榾柮暖溫溫

江西詩徵卷四十三